

go inconvenienter dicitur quod Spiritus Sanctus descendenter super eum.

3. Præterea, in baptismo Christi ostendit debuit, sicut in quodam exemplari, id quod fit in nostro baptismo. Sed in nostro baptismo non fit aliqua missio visibilis Spiritus Sancti. Ergo nec in baptismo Christi debuit fieri visibilis missio Spiritus Sancti.

4. Præterea, Spiritus Sanctus a Christo in omnes alios derivatur, secundum illud Joann. 1: De plenitudine ejus nos omnes accepimus. Sed super Apostolos Spiritus Sanctus descendit, non in specie columbae, sed in specie ignis. Ergo nec super Christum debuisse descendere in specie columbae, sed in specie ignis.

Sed contra est quod dicitur Luc. 3: Descendit Spiritus Sanctus corporali specie, sicut columba, in ipsum.

Respondeo dicendum, quod hoc, quod circa Christum factum est in ejus baptismo (sicut Chrys. dicit super Mat.¹), pertinet ad mystrium omnium qui postmodum fuerant baptizandi. Omnes autem, qui baptismi Christi baptizantur, Spiritum Sanctum recipiunt, nisi si fice accedant, secundum illud Jacob. 1: Omne datum optimum, et omne donum perfectum desursum est, descendens a Patre lumine.

Ad primum ergo dicendum, quod sicut August. dicit, 15 de Trinit.², absurdissimum est dicere, quod Christus cum jam triginta esset annorum, acceperit Spiritum Sanctum. Sed venit ad baptismum, sicut sine peccato, ita non sine Spiritu Sancto. Si enim de Joanne scriptum est, quod Spiritu Sancto replebitur ab utero matris sue, quid de homine Christo dicendum est, cuius ipsa concepcione non carnalis, sed spiritualis fuit? Tunc ergo, id est, in baptismo, corpus suum, id est, Ecclesiam praefigurare dignatus est, in qua baptizati præcipue accipiunt Spiritum Sanctum.

Ad secundum dicendum, quod sicut Augustinus dicit, in 2 de Trinit.³, Spiritus Sanctus descendisse dicitur super Christum corporali specie, sicut columba, non quia ipsa substantia Spiritus Sancti videretur, quæ est invisibilis, neque ita quod illa visibilis creatura in unitatem personæ divinae assumeretur; neque enim dicitur quod Spiritus Sanctus sit columba, sicut dicitur quod Filius Dei est homo

¹ Hom. 4 in Mat., in oper. Imp., a med. illius.

² C. 26, a med., t. 3.

³ C. 6, t. 3.

ratione unionis. Neque etiam hoc modo Spiritus Sanctus visus est in specie columbae, sicut Joannes vidit agnum occisum in Apocalypsi, ut habetur in Apocal. 2. Illa enim visio facta fuit in spiritu per spirituales imagines corporum; de illa vero columba nullus unquam dubitavit quin oculis visa sit. Nec etiam hōmodo in specie columbae Spiritus Sanctus apparuit, sicut dicitur 1 ad Cor. 10: Petra autem erat Christus. Illa enim petra jam erat in creatura, et per actionis modum nuncupata est nomine Christi, quem significabat; illa autem columba ad hoc tantum significandum repente extitit, et postea cessavit, sicut flamma quæ in rubo apparuit Moysi. Dicitur ergo Spiritus Sanctus descendisse super Christum, non ratione unionis ad columbam, sed vel ratione ipsius columbae significantis Spiritum Sanctum, quæ descendendo super Christum venit. Vel etiam ratione spiritualis gratiae, quæ a Deo per modum cuiusdam descensus in creaturam derivatur, secundum illud Jacob. 1: Omne datum optimum, et omne donum perfectum desursum est, descendens a Patre lumine.

Ad tertium dicendum quod, sicut Chrysostom. dicit super Matth.¹, in principiis spiritualium rerum semper sensibiles apparent visiones, propter eos qui nullam intelligentiam incorporalis naturæ suspicere possunt; ut si postea non fiant, ex his, quæ semel facta sunt, recipient fidem. Et ideo circa Christum baptizatum corporali specie Spiritus Sanctus visibiliter descendit, ut super omnes baptizatos invisibiliter postea creditur descendere.

Ad quartum dicendum, quod Spiritus Sanctus in specie columbae apparuit super Christum baptizatum propter tria. Primo quidem propter dispositionem quæ requiritur in baptizato, ut scilicet non fictus accedat; quia dicitur Sapient. 1: Spiritus Sanctus disciplinæ effugiet fictum. Columba autem est animal simplex, astutia et dolo carens; unde dicitur Mat. 10: Estote simplices sicut columbae. Secundo, ad designandum septem dona Spiritus Sancti, quæ columba suis proprietatis significat. Columba enim secus fluenta habitat, ut inde viso accipitre, mergat se ut evadat; quod pertinet ad donum sapientiae, per quam Sancti secus Scripturæ divinae fluenta resident, ut incursum diaboli evadant. Item columba meliora grana eligit; quod pertinet ad donum scientiae, qua Sancti sententias sanas, quibus pascantur,

¹ Hom. 12 in Mat., ante med., tom. 2.

elidunt. Item columba alienos pullos nutrit, quod pertinet ad donum consilii, quo Sancti eos homines, qui fuerunt pulli, id est, imitatores diaboli, doctrina nutrunt, et exemplo. Item columba non lacerat rostro, quod pertinet ad donum intellectus, quo Sancti bonas sententias lacerando non pervertunt, haereticorum more. Item columba felle caret, quod pertinet ad donum pietatis, per quam Sancti ira irrationaliter carent. Item columba in cavernis petræ nidificat, quod pertinet ad donum fortitudinis, qua Sancti in plagiis mortis Christi, qui est petra firma, nidum ponunt, id est, suum refugium et spem. Item columba gemitum pro cantu habet, quod pertinet ad donum timoris, quo Sancti delectantur in gemitu pro peccatis. Tertio, apparuit Spiritus Sanctus in specie columbae, propter effectum proprium baptismi, qui est remissio peccatorum, et reconciliatio ad Deum; columba enim est animal mansuetum. Et ideo, sicut Chrysost. dicit super Matth.¹, in diluvio apparuit hoc animal, ramum ferens olivæ, et communem orbis terrarum tranquillitatem annuntians, et nunc etiam columba apparet in baptismo, liberatorem nobis demonstrans. Quarto, apparuit Spiritus Sanctus in specie columbae super Dominum baptizatum, ad designandum communem effectum baptismi, qui est conjunctio ecclesiastice unitatis, unde dicitur Eph. 5, quod Christus tradidit semetipsum, ut exhiberet sibi gloriosam Ecclesiam non habentem maculam, aut rugam, aut aliquid hujusmodi, lavans eam laxacro aquæ in verbo ritæ. Et ideo convenienter Spiritus Sanctus in baptismo demonstratus est in specie columbae, quæ est animal amicabile, et gregale; unde et Cant. 5 dicitur de Ecclesia: Una est columba mea. Super Apostolos autem in specie ignis Spiritus Sanctus descendit propter duo. Primo quidem ad ostendendum fervorem quo corda eorum erant commovenda, ad hoc quod Christum ubique inter pressuras prædicarent; et ideo etiam in igne linguis apparuit. Unde August. dicit, super Joann. 2: Duobus modis ostendit visibiliter Dominus Spiritum Sanctum, scilicet per columbam super Dominum baptizatum, et per ignem super discipulos congregatos: ibi simplicitas, hic fervor ostenditur. Ergo ne Spiritu sanctificati dolum habeant, in columba demonstratus est; et ne sim-

plicitas frigida remaneat, in igne demonstratus est. Nec te moveat quod linguae divisæ sunt, unitatem in columba cognosce. Secundo, quia sicut Chrysost. dicit, cum oportebat delictis ignorare (quod fit in baptismo), mansuetudo necessaria erat, quæ demonstratur in columba; sed ubi adepti sumus gratiam, restat judicii tempus, quod significatur per ignem.

ARTICULUS VII.

Utrum illa columba, in qua apparuit Spiritus Sanctus, fuerit verum animal¹.

1. Ad septimum sic proceditur. Videtur quod illa columba, in qua Spiritus Sanctus apparuit, non fuerit verum animal. Illud enim videtur specie tenus apparere, quod secundum similitudinem apparet. Sed Luc. 3 dicitur quod descendit Spiritus Sanctus corporali specie, sicut columba, in ipsum. Non ergo fuit vera columba, sed quedam similitudo columbae.

2. Præterea, sicut natura nihil facit frustra, ita nec Deus, ut dicitur in 1 de Cœlo². Sed cum columba illa non advenerit, nisi ut aliquid significaret, atque preteriret (ut Aug. dicit, 2 de Trin.³), frustra fuisset vera columba, quia hoc ipsum fieri poterat per columbae similitudinem. Non ergo illa columba fuit verum animal.

3. Præterea, proprietates cuiuslibet rei ducent in cognitionem naturæ illius rei. Si ergo fuisset illa columba verum animal, proprietates columbae significassent naturam veri animalis, non autem effectus Spiritus Sancti. Non ergo videtur quod illa columba fuerit verum animal.

Sed contra est quod Augustinus dicit in lib. de Agone Christiano⁴: Neque hoc ita dicimus ut Dominum Iesum Christum dicamus solum verum corpus habuisse, Spiritum autem Sanctum fallaciter apparuisse oculis hominum, sed ambo illa corpora vera esse credimus.

Respondeo dicendum, quod (sicut supra dictum est⁵) non decebat ut Filius Dei, qui est veritas Patris, aliqua fictione uteretur; et ideo non phantasticum, sed verum corpus accepit. Et quia Spiritus Sanctus dicitur spiritus veritatis, ut patet Joann. 16, ideo etiam ipse ve-

¹ Joan. 1, 1. 20, et op. 60, c. 9.

² Text. 32.

³ In c. 6, in fin., tom. 3.

⁴ C. 22, a med., tom. 3.

⁵ Q. 5, art. 4.

ram columbam formavit, in qua appareret, licet non assumeret ipsam in unitatem personæ. Unde post predicta verba Augustinus subdit¹: Sicut non oportebat ut homines fallerent Filius Dei, sic etiam non oportebat ut falleret Spiritus Sanctus; sed omnipotenti Deo, qui universam creaturam ex nihilo fabricavit, non erat difficile verum corpus columbe sine aliarum columbarum ministerio figurare, sicut non fuit ei difficile verum corpus in utero Mariae sine virili semine fabricare, cum creatura corporea, et in visceribus feminæ ad formandum hominem, et in ipso mundo ad formandam columbam, imperio Domini voluntatique serviret.

Ad primum ergo dicendum, quod Spiritus Sanctus dicitur descendisse in specie vel similitudine columbæ, non ad excludendam veritatem columbæ, sed ad ostendendum quod ipse non apparuit in specie sue substantie.

Ad secundum dicendum, quod non fuit superfluum formare veram columbam, ut in ea Spiritus Sanctus appareret; quia per ipsam veritatem columbæ significatur veritas Spiritus Sancti, et effectum ejus.

Ad tertium dicendum, quod proprietates columbæ eodem modo ducunt ad significandum naturam columbæ, et ad significandos effectus Spiritus Sancti. Per hoc enim quod columba habet tales proprietates, ostenditur quod columba significet Spiritum Sanctum.

COMMENTARIUS.

1. In Christum baptizatum cur Spiritus Sanctus descendit. — Missio visibilis Spiritus Sancti qualiter ad Christum sit facta. — In his articulis tria tractat D. Thomas. Primum, cur baptizato Christo Spiritus Sanctus visus est in eum descendere, scilicet, ad significandum Spiritum Sanctum dandum esse per Christi baptismum, juxta illud: *Ipse vos baptizabit in Spiritu Sancto, Joan. 1*; et illud: *Nisi quis renatus fuerit ex aqua et Spiritu Sancto, c. 3*. Quod amplius explicans D. Thomas in solut. ad 1, dicit cum Aug., lib. 15 de Trinit., c. 26, non descendisse Spiritum Sanctum in Christum baptizatum, quod eum tunc primo repleverit. Ab instanti enim conceptionis sue ita fuit omni gratia refertus, ut crescere non potuerit. Descendit ergo ad significandum donum quod dandum erat baptizandis in Christo, et præterea ad indicandum donum illud plenissime ac perfectissime in Christo habi-

¹ Eod. 1. de Ag. Christian., cap. 22, post med., tom. 3.

tare, de cuius plenitudine omnes alii erant accepturi. Quod significatum est Joanni Baptistæ, quando illi dictum est, Joann. 1: *Super quem videris Spiritum Sanctum descendenter, et manenter, ipse est qui baptizat in Spiritu Sancto*, ut latissime exponit Aug., tract. 5 in Joau. Ex quo intelligitur aliter descendisse visibiliter Spiritum Sanctum in Christum et in Apostolos, aliosve Sanctos; ad Christum enim facta est missio visibilis solum quoad externam speciem et significationem, non vero quoad internum effectum et invisibilem missionem. Unde Spiritum Sanctum visibiliter mitti ad Christum, nihil aliud fuit quam Spiritus Sancti donum, quod a principio conceptionis in Christo erat ac permanebat, novo signo visibili manifestari. At vero in aliis simul cum novo visibili signo facta est interior Spiritus Sancti missio per nova dona gratiæ aut specialem eorum perfectiōnem. Et ad hunc modum exponendi sunt Patres, cum interdum videntur docere Christum in baptimate Spiritu Sancto fuisse unctum, impletumque illud Psalm. 44: *Unxit te Deus, Deus tuus, oleo lætitiae*, ut Athanas., orat. 2 contra Arianos; et Cyril. Hierosol., cat. 17 Illuminat., et 3 Mystagogica; et Optatus Milevitani, lib. 4 contra Parmen.; Hieron., Isa. 61; et Hilar., lib. 11 de Trinit.; intelligendi (inquam) sunt, quoad externam manifestationem illius unctionis. Nam alioqui certum est Christum in conceptione sua fuisse perfectissime Spiritu Sancto unctum perpetua atque inamissibili unctione, ut docuit Damasc., lib. 4 de Fid., c. 6; Ambr., lib. de Noe et arca, c. 3, et l. 2 in Lucam, in fine; ex quo id mutuatus est Beda, lib. 4 in Lucam, c. 10; et Greg., lib. 9 Registri, epist. 61. De qua re latissime egimus, multaque alia congesimus ex Patribus in priori tomo, disp. 18, sect. 1, 2 et 3.

2. Supra Christum baptizatum in specie columbæ cur Spiritus Sanctus apparuit. — Secundum declarat D. Thomas in sol. ad 4, cur apparuerit Spiritus Sanctus in specie columbæ. Cujus rei varias adhibet rationes, quæ ab ipso enucleate satis exponuntur. Summa omnium est, ut in columbæ proprietatibus tum effectus baptismi, tum dispositio suscipientis significantur. Quas breviter attigit Tertul., lib. de Bapt., c. 8, dicens: *Tunc ille sanctissimus Spiritus super emundata et benedicta corpora libens a Patre descendit super baptismi aquas, tanquam pristinam sedem recognoscens conquiescit columbæ figura delapsus in Domi-*

num, ut natura Spiritus Sancti declararetur per animal simplicitatis et innocentiae, quod etiam corporaliter ipso felle careat columba; lege Isidorum, lib. 12 Origin., c. 7. Unde quod

D. Thomas hic dixit, per simplicitatem columbæ significari dispositionem quam accedentes ad baptismum habituri sunt, ut expouerunt etiam Ambr. et Beda, in Lucam, Tertull. refert ad effectum baptismi, seu donum Spiritus Sancti quod per illum datur. Subjungit deinde Tertull. rationem aliam, quæ hic apud D. Thomam est tertia, quam paucioribus verbis ille complexus est, lib. contra Valentinum, c. 2, dicens: *Columba a principio divina pacis est pæco*. Quem imitatus Hieron., dial. Adversus Lucif.: *Emittitur (inquit) de arca corvus, et non reddit, et postea pacem terræ columba nuntiat. Ita et in baptimate Ecclesiæ teterrimo alite expulso, id est, diabolo, pacem terræ nostræ columba Spiritus Sanctus nuntiat*. Similia habet ep. 83, ad Ocean.; et Chrysost., hom. 12 in Matth.; et egregie Cyril. Hieros., dicta cat. 17, ubi latius figuram hanc et utramque rationem perseguunt; et Beda, Matt. 3, ubi aliam significat rationem his verbis: *Ideo Spiritus Sanctus super Salvatorem in specie columbæ apparuit, quia non veniebat ut per zelum peccata puniret, sed ut per mansuetudinem toleraret*. Et inde colligit rationem, ob quam Spiritus Sanctus in baptismo descendit in specie columbæ, in die vero Pentecostes in specie ignis, dicens: *In igne vero super simplices homines apparuit, ut eos ad punienda in se peccata spiritualis servor accenderet, quæ Deus per mansuetudinem vindicari parceret*. Quibus verbis comprehendit utramque rationem D. Thomæ hic, in eadem solut. ad 4. Tertio, declarat D. Thomas, art. 6, ad 2, et toto art. 7, qualis illa columba fuerit, et quomodo apparuerit. Quæ res diligentiore examinationem requirit, in disputatione sequenti tractandam.

ARTICULUS VIII.

Utrum convenienter, Christo baptizato, fuerit vox Patris audita Filium protestantis¹.

1. Ad octavum sic proceditur. Videtur quod inconveniente, Christo baptizato, fuerit vox Patris audita, Filium protestantis; Filius enim, et Spiritus Sanctus, secundum hoc quod

¹ Infr., q. 45, a. 4; et q. 66, a. 6, corp.; et op. 60, c. 9.

sensibiliter apparuerunt, dicuntur visibiliter esse missi. Sed Patri non convenit mitti, ut patet per Aug., in 2 de Trin. ¹. Ergo etiam nec apparere.

2. Præterea, vox est significativa verbi in corde concepti. Sed Pater non est Verbum; ergo inconveniente manifestatur in voce.

3. Præterea, Homo Christus non incepit esse Filius Dei in baptismo, sicut quidam haeretici putaverunt, sed a principio suæ conceptionis fuit Filius Dei; magis ergo in nativitate debuit vox Patris protestari Christi divinitatem, quam in ejus baptismo.

Sed contra est quod Matth. 3 dicitur: Ecce vox de celis dicens: *Hic est Filius meus dilectus, in quo mihi complacui*.

Respondeo dicendum, quod (sicut supra dictum est²) in baptismo Christi, qui fuit exemplar nostri baptismi, demonstrari debuit quod in nostro baptismo perficitur. Baptismus autem quo baptizantur fideles, consecratur in invocatione et virtute Trinitatis, secundum illud Matt. ult.: *Euntes docete omnes Gentes, baptizantes eos in nomine Patris, et Filii, et Spiritus Sancti*. Et ideo in baptismo Christi (ut Hier. dicit³) mysterium Trinitatis demonstratur. Dominus enim in natura humana baptizatur; Spiritus Sanctus descendit in specie columbæ; Patris vox testimonium Filio perhibentis auditur. Et ideo conveniens fuit ut in illo baptismo Pater declararetur in voce.

Ad primum ergo dicendum, quod missio visibilis addit aliquid super apparitionem, scilicet auctoritatem mittentis. Et ideo Filius et Spiritus Sanctus, qui sunt ab alio, dicuntur mitti visibiliter, et non solum apparere; Pater autem, qui non est ab alio, apparere quidem potest, visibiliter autem mitti non potest.

Ad secundum dicendum, quod Pater non demonstratur in voce, nisi sicut auctor vocis, vel loquens per vocem. Et quia proprium est Patri producere Verbum, quod est dicere, vel loqui, ideo convenientissime Pater per vocem manifestatus est, quæ significat Verbum. Unde et ipsa vox a Patre emissâ filiationem Verbi protestatur. Et sicut species columbæ, in qua demonstratus est Spiritus Sanctus, non est ipsa natura Spiritus Sancti, nec species hominis, in qua demonstratus est ipse Filius, est ipsa natura Filii Dei, ita etiam ipsa vox non pertinet ad naturam Verbi, vel Patris lo-

¹ C. 12, in fin., t. 3.

² Art. 6 hujus quest.

³ In Comm. 3 c. Matt., circa fin., tom. 9.



quentis. Unde Joann. 5 Dominus dicit: Neque vocem ejus, id est, Patris, unquam audistis, neque speciem ejus vidistis. Per quod (sicut Chrys. dicit super Joann.¹) paulatinus eos in philosophicum dogma inducens, ostendit quoniam neque vox circa Deum est, neque species, sed superior est et figuris et loquelas talibus. Et sicut columbam, et etiam humanam natu-ram a Christo assumptam tota Trinitas ope-rata est, ita etiam et formationem vocis. Sed tamen in voce declaratur solus Pater ut lo-quens, sicut naturam humanam solus Filius assumpsit, et sicut in columba solus Spiritus Sanctus demonstratus est, ut patet per Aug. in lib. de Fide ad Petrum².

Ad tertium dicendum, quod divinitas Christi non debuit omnibus in ejus nascitatem mani-festari, sed magis occultari in defectibus infantilis etatis. Sed quando jam pervenit ad perfectam etatem, in qua oportebat eum docere, et miracula facere, et homines ad se con-vertere, tunc testimonio Patris erat ejus divi-nitas manifestanda, ut ejus doctrina credibili-or fieret; unde et ipse dicit Joann. 5: Qui misit me Pater, ipse testimonium perhibet de-me. Et hoc præcipue in baptismo, per quem homines renascuntur in filios Dei adoptivos. Filii autem Dei adoptivi instituuntur ad similitudinem Filii naturalis, secundum illud Rom. 9: Quos præscivit, hos et prædestinavit confor-mes fieri imaginis Fili sui. Unde Hilarius dicit super Matt. 3, quod super Iesum baptiza-tum descendit Spiritus Sanctus et vox Patris audita est, dicentes: Hic est Filius meus dilectus; ut ex his, quæ consummabantur in Chri-sto, cognoscemus per aquæ lavacrum, et de caelestibus portis Sanctum in nos Spiritum in-volare, et paternæ vocis adoptione, Dei filios fieri.

COMMENTARIUS.

Vox Patris in baptismo Christi audita cur. — Ratio quam D. Thomas reddit, vocem Pa-tris auditam idcirco esse, ut expressa repræ-sentatio Trinitatis illiusque professio in bap-tismo Christi futura indicaretur, communis est Sanctorum omnium, ut videre licet in Aug., ser. 63 de Verbis Domini; Hier., Beda, Ansel., et Chrys., et aliis Græcis et Latinis, Matt. 3, et Luc. item 3. Ubi recte Ambros.:

¹ Hom. 39 in Joann., a med., tom. 3.² Cap. 9, circa princ., tom. 3.³ Can. 2 in Matt., circa finem.

Vidimus (inquit) Spiritum, sed in specie cor-porali, videamus et Patrem, sed quia videre non possumus, audiamus. Alia vero ratio addi-potest ex Cyp., l. 1 ad Quirinum, c. 10, au-ditam esse vocem Patris dicentes: Ipsum au-dite, eo quod tunc lex gratiæ inchoari videtur. Tertia addi potest ex Hilaro, can. 2 in Matth., illius paternæ vocis testimonio indi-catum esse, nos per adoptionem filios Dei ficeri, cum per baptismum regeneramur. Re-liqua, quæ in solutionibus argumentorum tra-duntur, licet observatione digna sint, exposi-tione non indigent.

DISPUTATIO XXVII;

In tres sectiones distributa.

DE HIS QUÆ IN BAPTISMO CHRISTI ACCIDERUNT.

Tria narrantur ab Evangelistis, colorum apertio, columbæ descensus, et vox Patris. De quibus sigillatim dicemus, ac tandem ordi-nem eorum, quidque ad baptismum Christi contulerint, vel an naturam ejus mutaverint, explanabimus.

SECTIO I.

Utrum baptizato Christo vere fuerit cœlum apertum, ita ut externis sensibus percipi potuerit.

1. Baptizato Christo non est in cœlis facta divisio. — Primo, Doctores omnes sine con-troversia ac fere sine disputatione docent cœlum, quod elementis imminet, non fuisse re ipsa divisum, non quia id fuerit Deo impos-sibile; sed quia tam in usitatum miraculum nec fuit tunc necessarium, nec verba Scriptu-ræ cogunt ut id fingamus. Primum declara-tur, quia imprimis cœlum incorruptibile di-vidi miraculum est. Deinde illo diviso, vel oportuisset spalium interjectum vacuum re-linqui, vel elementa ad illud replendum as-cendere. Ad hæc, si illa divisio fieret in cœlo, et non in aere, non posset certe oculis per-cipi sine novo miraculo; si vero facta est si-mul in aere, hoc sufficit ad representationem mysterii, nec oportuit divisionem ad cœlos usque pervadere, quo vix possunt humani sensus attingere. Denique etiam Ezechiel., cap. 1, dicuntur cœli fuisse aperti; et Genes. 7, et Act. 7, et saepe alias, reperitur idem mo-dus loquendi Scripturæ, et non propterea fit ut passim cœli divisi fuerint. Quomodo autem cœli dicantur aperti Christo baptizato, non eodem modo ab omnibus explicatur.

statim ascendens de aqua, vidit cœlos apertos. Solus ergo ipse vidit; ergo non est facta mu-tatio neque ostensio aliqua in objectis sensibilibus, quæ aliorum etiam oculis patebant; ergo fuit solum imaginaria in Christo, vel certe intellectualis.

4. Cœlos in Jordane sensibiliter apertos alii præter Christum vident quomodo. — Sed re-torquendo hoc idem fundamentum, rejicienda videtur hæc sententia, quia illa apertio colo-rum non soli Christo, sed ceteris etiam, qui præsentes aderant, ostensa est; ergo signum est factam esse per aliquam externam muta-tionem et visionem sensibilem. Patet conse-quentia, quia, licet potuerit fieri in singulo-rum imaginationibus, tamen alius modus erat facilior, et hominum multitudini accommo-datior. Antecedens vero constat ex omnibus conjecturis quas supra adduximus, ob quas fuit expediens cœlos aperiri in Christi baptis-mate. Nam omnes fundantur in significacione mysterii, quæ illo sensibili signo facta est; illa autem significatio sensibilis, non erat Christo necessaria, sed nobis; ergo oportuit ut talis esset, quæ ab aliis perciperetur. Un-de Sancti omnes, qui eas rationes afferunt, non obscure hoc supponunt. Et hinc etiam fit, illam apertio non debere omnino meta-phorice exponi, quia sic exposita non signifi-cat aliquod sensibile signum distinctum a des-censu columbæ, sed solam intelligentiam mys-terii cœlestis et spiritualis ibi reconditi; ergo cum illa apertio censeatur facta propter spe-cialem significacionem, non solam metapho-ram continet, sed veram mutationem in re factam et sensibus objectam significat. Et au-geri potest vis hujus rationis, quia Evangelistæ tria illa distincte enumerant, cœlum aper-tum, columbam descendenter, et vocem de cœlo factam; ac duo posteriora intelliguntur aliquo modo proprie facta, et sensibus objec-ta, inter se distincta; ergo eodem modo in-terpretandum est primum, quod sit signum aliquod sensibile distinctum ab aliis duobus. Confirmatur præterea ex Marco, qui sub eo-dem verbo inquit: Vedit cœlos apertos, et Spi-ritum tanquam columbam; sicut ergo intelligit sensibili et externa visione vidisse columbam, ita et vidisse cœlos apertos intelligendum est. Unde sicut dicens Marcus Christum vidisse columbam, non excludit quin alii viderint, ita etiam dum dicit vidisse cœlos apertos, non propterea solum ipsum vidisse putandum est. Neque etiam ex verbo Matthei hoc colligi po-test. Tum quia verbum illud, aperti sunt ei,